



Inatsisartuni ilaasortaq, Erik Jensen, Siumut

-/Maani

§ 37 naapertorlugu apeqquteqaammut nr. 088 qilalukkat qernertanut tunngasumut akissuteqaat

Inatsisartut suleriaasissaanni § 37-mi imm. 1 naapertorlugu apeqqutinik Naalakkersuisunut nassiussaqaarsimavutit, qilalukkat qernertat pillugit. Apeqqutitit uanga suliaasaqarfisannut akisassanngortinneqaarsimapput.

1-mut) "Naalakkersuisut §37 apeqquteqaammut akissuteqaatiminni nalunaarutigaat aqutsivik Upernavimmi qilalugartassat 52-usut tamakkerneqaarsimasut, taassumalu kingiorna pisassiisoqaqqittoqarnaviannngitsaq. Naalakkersuisut tamanna attatiinnarpaat?"

Akissut:

Qinnuteqaat tiguneqartoq tunngavigalugu Naalakkersuisunut isummernissamut tunngavissiaq suliarineqareerpoq. 2021-mut pisassiissutit aalajangerneqarnikut katillugit 52-iupput kiisalu qilalukkat qernertat marluk 2020-miit nuunneqarnikuullutik. Kisiannili pisarineqaarsimasutut nalunaarutigineqartut katillugit 63-it tiguneqarput, tamannalu isumaqarpoq ukioq manna pisassiissutit qilalukkanik qernertanik qulingiluanik sinnerneqaarsimasut. Taamaattumik juunip sisamaani 2021 qilalukkanik qernertanik piniarnerup unitsinneqarnissaa pillugu APN tusagassiorfinnut nalunaarummik saqqummiussaqaarpoq.

Naalakkersuisoqarfiup tusagassiorfinnut nalunaarutaanut Juunip sisamaani 2021-meersumut apeqqutit innersuussimagukku, apeqqutinni nr. 1-imi issuaanerup oqaasertai eqqunngillat. Tusagassiorfinnut nalunaarutip juunip sisamaaneersup nuutsinnera ilannguppara. Tusagassiorfinnut nalunaarutip siunertaraa nalunaarutigissallugu piniarneq unittoq, ukiumut pisassiissutit tamakkerlugit pisarineqarmata sinnerneqarlutillu.

2-mut) "Thulep eqqaani qilalugartassiinissamut suut killilersuutigineqarpat?"

Akissut:

Qilalukkanik qaqortanik qernertanillu illersuineq piniarnerlu pillugit Namminersorlutik Oqartussat nalunaarutaat nr. 3, 27. januar 2017-imeersoq Kalaallit Nunaat tamakkerlugu Qaanaap eqqaa ilanngullugu atuuppoq. Kisianni nalunaarummi § 12, imm. 3-imi aalajangersagaqarpoq aqutsiveqarfanni Qaanaami Tunumilu taamaallaat atuuttumik, makkua pineqartillugit: "Qilalukkanik qaqortanik qernertanillu piniarnermut atatillugu qassutinik nigartap tamakkerluni iluatungimigut nerutussusianik minnerpaamik 380 mm-inik atuinissaq, taamaallaat Qaanaap aqutsiveqarfiani kiisalu Kangiani sumiiffinni aqutsiveqarfanni ajornartitaanngilaq."

Tak. §-imi tassani, imm. 5; "Qilalukkanik qaqortanik imaluunniit qilalukkanik qernertanik piniarnermut atatillugu qassutit atorneqartillugit, kommunalbestyrelsi qassusersorluni piniarneq pillugu kommunimi ileqqoreqqusamik suliaqassaaq." Qassutit atorneqarneri pillugit kommunimi ileqqoreqqusamik Avannaata Kommunua suliaqarnikuunngilaq. 2020-

Dato 15-07-2021
Suliap normua: 2021 - 12856
All nr. 3 17267626
Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apn@nanoq.gl
www.naalakkersuisut.gl

imi Naalackersuisoqarfiup Kommunimi ileqqoreqqusassamut missingersuummut siunnersuut ilaatigut Avannaata Kommunianut nassiuppaa. Akissummik tigusaqartoqanngilaq.

Tak. §-imi aamma tassani, imm. 6; "Qilalukkanik qaortanik aamma qernertanik piniarneq Qimusseriarsuarmi eqqissimatitsivik 1-ip iluani qajaq atorlugu ingerlanneqassaaq. Qaortat imaluunniit qernertat aallaaneqartinnagit naalinneqassapput." Aalajangersagaq taanna ukiuni arlalinni piusimavoq.

Tamatuma saniatigut Avanersuup kommunitut killeqarfitoqaanut atuussimasumik kommunimut ileqqoreqqusaqarsimavoq, kangerluit ilaanni qilalukkanik qernertanik piniarnermut atatillugu qaannap naalikkallu atorneqarnissaat piumasaqaammut tunngasumik, suli atorunnaarsinneqanngilaq imaluunniit Avannaata kommunianit allanngortinneqanngilaq.

3-mut) "Nunatta kangiani qilalugartassiinnissamut suut killilersuutigineqarpat?"

Akissut:

Tak. 2-mut akissut, § 12-imi aalajangersagaq aamma Tunumut atuuppoq. Taamaattorli ilanngunneqassaaq Tunumi qilalukkanik qernertanik piniarnermut atatillugu qassutinik atuneq pillugu kommunimi ileqqoreqqusamik 2013-imi Kommuneqarfik Sermersooq suliaqarsimammat. Tunumi qaannap imaluunniit naalikkap atornissaa pillugu kommunimi ileqqoreqqusaqanngilaq.

4-mut) "Naalackersuisut kulturerput ileqqutoqqavullu aallaavigalugit piniartarnerup illersorneqanissaa kissaatigat?"

Akissut:

Nalunaarummi qulaani taaneqartumi piniariaatsit pillugu aalajangersakkami § 12, imm. 2-imi unaap atornissaa pillugu aalajangersagaqarpoq; "Ajornartinnagu qilalugaq qaortaq qernertarlunniit nangillugu toqussutissaanik aallaaneqartinnagu naalillugu annaanaveeraneqassaaq." §-imi aamma tassani, imm. 6-imi allassimavoq: "Qilalukkanik qaortanik aamma qernertanik piniarneq Qimusseriarsuarmi eqqissimatitsivik 1-ip iluani qajaq atorlugu ingerlanneqassaaq. Qaortat imaluunniit qernertat aallaaneqartinnagit naalinneqassapput."

Tamatuma saniatigut nalunaarutigineqarsinnaavoq, piniarneq aallaaniarnerlu pillugu Inatsisartut inatsisaata allanngortinneqarnissaanik siunnersuummik Naalackersuisut suliaqarmata, ileqqutoqqat malillugit piniariaatsimik aamma – atortunik atuinermut tunngasunut aalajangersakkat ersarissarniarlugit sulisoqarluni, kulturitoqarput ileqqutoqqat malillugit piniariaaserput aamma – atortugut illersornissaat pissutigalugu. Suliniut taanna Naalackersuisut naalackersuisoqatigiinnissamik isumaqatigiissutaannut april 2021-meersumut naapertuuppoq.

Piniarneq aallaaniarnerlu pillugit inatsimmut allannguutissatut siunnersuut aamma atuuttup allaaserinera qulaani taaneqartoq aallaavigalugu, isumaqarpunga kulturitoqarput ileqqutoqqat malillugit piniariaaserput aamma – atortugut illersornissaat Naalackersuisut suliatut ingerlatereeraat.

5-mut) "Naalackersuisut Lars Poulsen, Siunniut §37 apeqqutaanut nr. 037-imut nalunaarutigat Nunatta kangiani ukiuni tulluuttuni qilalugartassiissutit ikiliartortineqarnissaanut pilersaarutinut aallanngortitsinissamut periarfissaqarnatik. Naalackersuisut tamanna attappaat?"

Akissut:

2020-mut pisassiissutit Januarip appaani 2020-imi kiisalu 2021-mut pisassiissutit Decembarip 21-iani 2020-mi aalajangiiffiqineqarput, kommuninilu ataasiakkaani pisassiissutit agguaqinneqareersut allannngortinnarsinnaanngilakka piffissaq piniarfiusup qiteqqutereersoq.

Pinngortitaleriffimmi ataatsimeeqateqartarnerit aallarnisarpakka, juni 2021-mi ataatsimiinnermi kingullermi siunertarineqartoq tassaalluni uumassusilinnik misissuinerit inernerineqartut kingullit, matumani ilanngullugu saqqummiunneqarlutik uumassusillit pillugit inassuteqaatit Tunumut atuuttut. Aallarnisaataasumik ataatsimiinnerup siulliup malitsissaanik piffissami ukiassariartulernerani ukiakkullu ataatsimiinnermik malitseqassaaq.

Aaqqiissuteqarsinnaanerit sioqqullugit Upernavimmi pissutsinik misissuineruut aamma Tunumi pissutsit taamatut misissussavakka. Tassunga atatillugu qaammammi martsimi NAMMCO-p ataatsimiinnerani Tunumi qilalukkat qernertat pillugit piniartut ilisimasaat piniartunit saqqummiunneqartut qanimut misissussallugit pingaaruteqarpoq.

Pisarineqartunik nalunaarsuinerit tiguneqarsimasut naapertorlugit sulii Qaanaami, Ittoqqortoormiini Tasiilamilu qilalukkanut qernertanut pisassiissuteqarpoq.

6-mut) "Kangerluk Kangerlussuaq Tasiilami piniartut naapertorlugit qilalukkanik piniarfigalugu ornittagaajunnaarnikuuvoq, taamaakkaluartoq Naalakkeruisut § 37, nr. 037 apeqqummi akissutiminni attappaat pisassiissutit Kangerlussuarmiittut pinngitsooratik pisriassagaat, allamik siunnersuisoqartinnagu, tamanna ima paasivarpur siunissami pisassiisoqarnaviannnginneranik. NAMMCO'p piniartut aaqiissuussaasumik saqqummiussaani paasissutissaataanik kingulernut pissarsiaanut, matumani uumassusilinnik misissuinerit siunnersuinerillu piniartut ulluinnarni isigisaanut naapertuutinnngineranut qanoq tamakku ataqatigiippat?"

Akissut:

Ilisimaneqartut uumassusilerituut inassuteqaataat kingulleq 2019-imeersumi kiisalu 2021-imi martsimi NAMMCO-p ukiumoortumik ataatsimiinnerani Tunu tamakkerlugu Kangerlussuaq ilanngullugu pisaqartoqannginnissaa uteqqinneqarpoq. Annertuumik isumakuluutiginninnermut pissutaavoq piniarnerup annertusiartuinnartup qilalukkat qernertaqatigiit ikittunik taaneqartartut ikiliserujussuarsinnaanerit sumiiffinni uumasooqatigiit nungutaasinnaallutik imaluunniit ima ikilisinneqarsimatigalutik kinguaassiorsinnaajunnaarlutik.

Naalakkersuisuusimasut januarip appaani 2020-imi aalajangerpaat aqutsiveqarfanni pingasuni qilalukkanut qernertanut pisassiissutit ikilisikkiartuaarneqarnissaat; Ittoqqortoormiini, Kangerlussuarmi Tasiilamilu neqissaqarniarneq eqqarsaatigalugu piniarneq unitsivinngikkaluarlugu. Inassuteqarnerit kingullit ilaanni Kangerlussuarmi qilalukkanik qernertaqassusianut pissutsit kujasinnerpaami qilalukkanik qernertaqassusianut naleqqiullugu pitsaanerupput, taamaattumik Kangerlussuup eqqaani qilalukkanik qernertanik qulinik Tasiilamilu uumasooqatigiinnik tallimanik pisassiiniarlutik Naalakkersuisut toqqarpaat.

2020-imi Naalakkersuisoqarfiup aaqqissugaanik piniagassat killilersukkat pillugit innuttaasunik ataatsimiisitsinermi matumani ilanngullugit qilalukkat qernertat, piniartut peqataasut ilaasa nalunaarutigaaq silap, sikup pisassiissutillu periarfissaqartippassuk sulii Kangerlussualiartarlutik. Aamma nalunaarutigaaq akulikinnerusumik Kangerlussuup eqqaanukartarsimallutik ilaatigut Namminersornerullutik Oqartussaasimasunit piniariarluni angalanermut tapiissuteqartoqartarsimammat, ilaatigullu 2006 sioqqullugu qilalukkanut qernertanut pisassiissutinut killilersuisoqanngimmat. Nunap

ungasissuserujussua angallammillu angalaneq aningaasartuutaqisoq eqqarsaatigalugit killilersuisoqartinnagu immakkut angalaneq imminut akilersinnaanerusimanera takuneqarsinnaavoq. Kisianni ajornartorsiutaasimavoq, umiatsiaaraannarmik angalanermi pisat tamaasa assartornissaat, mattaap assartornissaat pingaernerutittariaqartarsimavaat aningaasartuutit matussusersinnaajumallugit. Ungasissumut angalanerup takutippaa pisanik atorluaasinnaannginneq.

Ilumoorpoq uagutsinnut saqqummiunneqartut uumassusilerituut inassuteqaataat piniartullu ilisimasaat assigiinngitsorujussuusut. Eqimattat taakkua marluusut tamarmik immikkut suleriaaseqarput misissueriaaseqarlutillu. Taakku arlaata aappaataluunniit imaluunniit eqimattat marluusut ilisimasaat kukkusuunersut imaluunniit eqqortuunersut pillugit oqaaseqarsinnaanissamut ilisimasaqanngilanga. Piniarneq aallaaniarnerlu pillugit inatsit naapertorlugu, uumassusilerinikkut ilisimasat Naalakkersuisut isiginiassavaat, kisiannili aamma piniartut atuisut ilisimasaat suliap ingerlanerani aalajangiinermi eqqaamassallugit. Eqimattanit marluusunit annerusumik pitsaanerumillu uppernarsaasoqarpat, taava Naalakkersuisut isumannaatumik aalajangiinissamut tunngavigissaarnerussapput. Uanga Naalakkersuisut nammineerlunga pisariaqartippara ilisimatuuksutikkut inassuteqarneq qanimut paasinissaa kisiannili aamma minnerunngitsumik NAMMCO-p ukiumoortumik ataatsimiinnerani Tunumiit piniartut saqqummiussaata qanimut qimerloornissaa.

7-mut) "Naalakkersuisut qaannamik qilalukkat pisarineqarsinnaanerat eqqarsaatigalugu pisassiissutit ilaqqinniarpaat?"

Akissut:

Apeqqut 1-imut akissut tak.

2019-imi taamani Naalakkersuisuusut aalajangerput Qimusseriarsuarmi (Savissiviup Upernaviullu pigisaani nunaqarfiit avannarlersaaneersut) qajaq atorlugu qilaluganniarsinnaanissaannut 20-nik qilalugartassiisoqassasoq. Piniartulli namminneerlutik qilalukkat umiatsiaaqanik pisarineqarnissaat aalajangersimavaat. Tamatuma saniatigut pisassat ilaasa qaannamik pisarineqartussanngorlugit pisassiissutigineqartarnissaat aqutsiveqarfiit ataasiakkaat namminneerlutik aalajangersinnaavaat.

8-mut) "Naalakkersuisut allanik paasissutissaasinnaasunik peqarpat?"

Akissut:

2021-imi § 37 naapertorlugu apeqqutigineqartunut akissutit 8-t allat kiisalu ukiuni kingullerni 2-3-ni qilalukkat pillugit paasissutissat Inatsisartut Aalisarnermut, Piniarnermut Nunalerinermullu Ataatsimiititaliaanut nassiunneqartarsimasut innersuussutigineqarput, nassiussat pineqartut aqqutigalugit qilalukkat qaqqortat qernertallu pillugit Naalakkersuisut Naalakkersuisoqarfiullu paasissutissaatai tamarluinnarmik nassiunneqartarsimammata.

Tamatuma saniatigut ilisimatitsissutigisinnaavara Pinngortitaleriffik ilisimatitsinikummat 2020-mi aammalu 2021-imi misissuinissamut pilersaarutit tamarmik COVID-19 pissutigalugu kinguartinneqarnikuusut. Taamaattumillu uumassusilerinikkut inassuteqaatit ilaatigut Tunumut, pingaartumillu Ittoqqortoormiitut Qimusseriarsuarmullu tunngasut pissutsit pitsaanerulernissaannut utaqqimaarneqartut, tamatumalu ukiup tulliani imaluunniit 2023-imi aatsaat pinissaat naatsorsuutigineqarluni, paasissutissat

pissarsiarineqarsimasut suliarineqaqqaartussaammata ilisimatuussutsikkut naliliisarnerit aqqtigalugit.

Taamatutaaq ilisimatitsissutigissavara Tunumeersut piniartut qilalukkat pillugit ilisimasaminnik saqqummiussinerat NAMMCO-mit soqutigineqarlualuni tigulluarneqarmat. Saqqummiinerit taamatut ittut siullersaraat Tunumilu qilalugartassat pillugit siunnersuisarnernik suli allanngortitsinissamut tunngavissiigani. NAMMCO ukiumoortumik ataatsimeersuarnermini aalajangerpoq piniartut ilisimasaat pillugit suliat annertusarneqassasut. Naalackersuisutut akisussaasutut kissaatigissavara suliat NAMMCO-mi suliniaqatigiiffinniluunniit allani nangillugit suliarineqalersinnagit Kalaallit Nunatsinni piniartut atuisullu ilisimasaasa katersorneqarlutillu atorneqarnissaat annertusarneqaqqullugu.

Isumaga malillugu suliassaq pingaarutilerujussuaq ilusilersorlugulu aqqissortariaqartoq aatsaat aallartipparput. Pingaernerpaarli tassaavoq suliassap aqqissuulluakkamik KNAPK aamma kommunit suleqatigalugit suliarineqarnissaa, peqataasut peqataatinneqartutut akisussaaqataasutullu misigisimaniassammata. Piniartut atuisartullu ilisimasaannik ilusilersorluakkamik aqqissorluakkamillu katersinikkut isumaga naapertorlugu piniakkanut killersorneqartunut killilersorneqanngitsunullu pisassiissutissanik allatulluunniit aaqqiissutissanik Naalackersuisut aalajangiiniartarnerminni pitsaanerusunik tunngavissaqalissapput.

Inerniliillunga piniakkat killilersukkat allat tamakkerlugillu pisarineqarneq ajortut innersuussutigissavakka, tassunga ilaallutik qilalukkat qaortat, ukkatarineqarnerusariaqartut, qilalukkat qernertat isiginiarpallaarunnaarlugit. Naalackersuisut naalackersuisooqatigiinnissamik isumaqatigiissutiminni nammineq pilersornerup annertusarneqarnissaa pingaartissimavaat, pisuussutigulli qilalukkat qernertaannaangillat.

Arfernik angisuunik pisassaqpugut tamakkerlugit pisarineq ajukkatsinnik, UKA 2020/36-imi nassuiaat takuuk. Tamatuma saniatigut aarrit pisassat, qilalukkat qaortat pisassat, uumasut killilersugaanngitsut soorlu puisit, arferit mikinerusut nunamilu uumasut miluumasut ilaat pisanut nalunaarutaasartut aallaavigalugit tamakkerlugit pisarineqarneq ajorput.

Med venlig hilsen

Aqqaluaq B. Egede
Aalisarnermut Piniarnermullu Naalackersuisoq